

PENGAJIAN KITAB IHYA' 'ULUMIDDIN kali ke-33
(Karya Hujjatul Islam Imam Al-Ghazali)
Kuliah Maghrib kali ke-117
Surau An-Nur, Sungai Nyior, Trong, Perak.

ILMU BAHASA ARAB

Tentang ilmu bahasa umpamanya, singkatkanlah sekadar dapat memahami dan bercakap-cakap dengan bahasa Arab itu. Dan dipelajari yang luar biasa dari ilmu bahasa itu untuk dapat difahami yang luarbiasa pula dari susunan Al-Quran dan Al-Hadith.

Tinggalkanlah berdalam-dalam padanya dan singkatkanlah dari ilmu nahu (tatabahasa) itu sekadar yang berhubungan dengan Kitab Suci dan Sunnah Nabi.

ILMU TAFSIR

Yang singkat tentang ilmu tafsir ialah yang banyaknya dua kali Kitab Suci Al-Quran sendiri, umpamanya tafsir yang disusun oleh 'Ali Al-Wahidi An-Naisaburi iaitu "Al-Wajiz".

Yang sedang (sederhana) adalah sampai tiga kali (tebalnya) daripada Al-Quran sendiri seperti yang disusun oleh 'Ali Al-Wahidi iaitu "Al-Wasith".

Dan selain itu adalah secara mendalam yang tidak diperlukan sangat dan tidak akan habis-habis sepanjang usia.

ILMU HADITH

Adapun hadith, yang singkat daripadanya adalah memperoleh apa yang ada dalam kitab Sahih Bukhari dan Sahih Muslim, dengan meminta pengesahan hadith yang dipelajari itu kepada seorang yang berilmu dengan matan (teks/kata-kata) hadith itu.

Mengenai perawi-perawi hadith itu, maka engkau cukupkan sahajalah dengan perawi-perawi sebelum engkau sendiri, dengan berpegang dengan kitab-kitab yang ditulis oleh mereka. Tidak perlulah kiranya engkau menghafal seluruh hadith yang terdapat dalam kedua-dua ‘Sahih’ itu. Tetapi berusaha sehingga apabila memerlukan kepadanya, maka (engkau) sanggup mencarinya dalam kitab hadith yang disebutkan tadi.

Mengenai yang sedang (sederhana) pada hadith ialah dengan menambah kepada kitab sahih yang dua di atas tadi, hadith-hadith yang terdapat dalam kitab-kitab musnad yang sahih.

Adapun yang meluas dan mendalam ialah di balik (yang lebih daripada) yang tadi, sehingga melengkapi kepada seluruh hadith yang diterima, baik yang dhaif, yang kuat, yang syah dan yang cacat, serta mengetahui pula cara-cara penerimaan hadith itu, keadaan orang-orang yang menjadi perawi hadith, namanya dan sifatnya.

ILMU FIQH

Adapun fiqh, yang singkat daripadanya ialah apa yang terkandung dalam kitab “Mukhtasar” karangan Al-Mazani, kitab mana kami telah susun dalam “Khulasah Al-Mukhtasar”.

Yang sedang pada fiqh ialah yang sampai 3 kali banyaknya berbanding Mukhtasar Al-Mazani, iaitu kira-kira sama dengan isi kitab “Al-Wasith minal Mazhab” karangan kami.

Dan yang mendalam ialah melebihi daripada yang kami muatkan dalam “Al-Wasith” tadi dan seterusnya sampai kepada kitab yang besar-besar.

ILMU KALAM

Adapun ilmu kalam, maka maksudnya ialah menjaga ‘aqidah yang dinukilkan Ahlus Sunnah dari ulama salaf yang soleh. Tidak lain daripada itu. Dan di balik (yang lebih daripada) itu ialah mempelajari untuk menyingkap hakikat dari segala sesuatu, tanpa cara tertentu.

Yang dimaksudkan dengan memelihara ‘aqidah yang dinukilkan Ahlus Sunnah itu ialah mencapai tingkat yang ringkas daripadanya dengan ‘aqidah yang ringkas, iaitu sekadar yang kami muatkan dalam kitab “Kaedah-kaedah I’tiqad” yang termasuk dalam jumlah kitab besar (Ihya’ ‘Ulumiddin) ini.

Yang sedang pada ilmu kalam ialah yang sampai kira-kira 100 lembar buku, iaitu sekadar yang kami muatkan dalam kitab “Al-Iqtisad fil I’tiqad”.

Pengetahuan sebanyak tadi diperlukan untuk melawan tukang bid’ah dan menentang bid’ah yang diada-adakan, sebab merosakkan dan menghilangkan ‘aqidah yang benar dari hati orang awam. Usaha itu tidak ada gunanya kecuali terhadap orang awam yang belum fanatik benar.

Terhadap pembuat bid’ah itu sendiri, apabila ia sudah tahu berdebat meskipun sedikit, maka tidak ada gunanya lagi berbicara dengannya.

Sebab, walaupun engkau sudah mematahkan kesemua keterangannya, dia tidak akan meninggalkan mazhab yang dianutnya, tetapi dialihnya dengan alasan bahawa dia sendiri yang kekurangan keterangan, sedangkan pada orang lain dari golongannya, masih ada jawapan dan dalil yang cukup. Jadi, hanya anda saja yang berhadapan dengannya, dengan kekuatan perdebatan yang cukup.

Adapun orang awam, apabila telah berpaling dari kebenaran dengan menggunakan perdebatan, maka masih mungkin diajak kembali kepada kebenaran itu, sebelum bersangatan benar fanatiknya kepada hawa nafsunya. Kalau sudah (fanatik), maka putuslah harapan mengembalikannya. Kerana fanatik adalah suatu unsur yang membawa kepercayaan itu melekat ke dalam jiwa.

Dan fanatik itu ialah sebahagian daripada penyakit ulama jahat. Kerana ulama jahat itu bersangatan benar fanatiknya kepada apa yang dianggapnya benar. Dan memandang kepada golongan yang berbeza fahaman dengan mereka dengan pandangan menghina dan mengejek.

Jikalau sekiranya mereka datang dari segi lemah-lembut dan kasih sayang serta nasihat-menasihati secara berbisik, tidak dalam tontonan fanatic dan hina-menghina, nescaya mereka mendapat kemenangan.

IMBASAN KULIAH TERDAHULU

Ilmu itu ada 3 bagian :

1. Ilmu yang sedikit pun tercela, banyak pun tercela.
2. Ilmu yang sedikit pun terpuji, banyak pun terpuji.
3. Ilmu yang terpuji tetapi ada hadnya. Jika terlebih ilmu itu, sudah tidak terpuji.

Contoh-contohnya :

1. Contoh ilmu jenis pertama ialah ilmu sihir, mantra dan nujum. Ilmu-ilmu ini tidak membawa manfaat. Membuang masa mempelajarinya adalah tercela.
2. Contoh ilmu jenis kedua ialah ilmu tentang Allah Ta'ala.
3. Contoh ilmu jenis ketiga ialah ilmu-ilmu fardhu kifayah.

Adapun ilmu yang terpuji setinggi-tingginya ialah ilmu tentang Allah Ta'ala.

Yang menolong kita tentang akhirat ialah :

1. Mujahadah (kesungguhan).
2. Riadah (latihan)
3. Kebersihan hati.
4. Kebebasan hati dari segala ikatan duniawi.
5. Mencontohi para nabi dan para wali.

Ulama kosong – menunjukkan jalan kepada amal zahiriyyah, seperti tabib-tabib di jalanan menunjukkan jalan dengan menggosok badan zahiriyyah.

Ulama akhirat – tidak menunjukkan jalan selain dengan mensucikan batin, mencabut benda-benda jahat yang merosakkan tanaman dan akar-akarnya dari hati

Sesungguhnya hati apabila kosong daripada sifat yang tercela, maka penuhlah ia dengan sifat terpuji

Maka janganlah engkau menghabiskan waktu dengan fardhu kifayah, apatah lagi apabila sudah berdiri segolongan anggota masyarakat yang mengerjakannya.

Janganlah anda menghabiskan umur pada satu ilmu sahaja daripada ilmu-ilmu itu, kerana (dengan alasan) hendak mendalaminya sungguh-sungguh. Sebab ilmu itu banyak dan umur itu pendek.

MAKLUMAN

Ingin mendengar/menonton kuliah-kuliah syarah kitab Ihya' 'Ulumiddin yang lepas-lepas?

Semua siri kuliah kitab Ihya' 'Ulumiddin di surau ini boleh didengar semula di internet di:

1. Youtube (taipkan "syarah ihya").
2. Laman <http://syarahihya.blogspot.com/>
3. Laman AlMuttaqinTv bawah Yayasan Islam Kedah.

Sehingga kini kita sudah ada **216 fail** kuliah Syarah Ihya' 'Ulumiddin di internet (di Youtube). Setiap satunya sepanjang lebih kurang 8 minit. Terdapat 99 fail audio dan 117 fail video. Selamat mengambil manfaat.

PENGAJIAN KITAB IHYA' 'ULUMIDDIN

Bulanan – Masjid PGA Ulu Kinta, Ipoh.

Mingguan – Surau An-Nur, Sungai Nyior, Trong.

